

Marakwet - Sāruunō :Siruut Chēpō Iriin - Salvation Scriptures

Ēpēēsō 2:2 Kiitootuupēēkwaan ātēpuut choo nāmēy keey nkōō ātēpoo ng'wēny akyootuupēy Syeetaani nyoo pāytooyiintoo toomirmiirēy chaa raacheen chēpō woowēēs parak. Pāytooyiintonoonēē :nyi mii kupāyiisyēērēē choo mātēērēy iit Iriin.

Mataayo 6:10 Kanya kichō :pāyuunātēēng'uung', aku-ira makēēng'uung' mu ng'wēny kilēē paani lēē mu kipsēnkwēt.

Luuka 22:42 Kii nēē it tulwoonoonēē, kilēēchi kiineetanichiich, "Asaa simooputyō nēē /kuutyamaak."

Chowaana 16:7-9 Āmwoorwook man kilē kārāmiituuy nkōō wōloo āmiikwaan nēē āwō, āmu nēē moowō, kimāchōōnēy :Toomirmiiryoonoonēē chākuutoorētook. Ku nēē āwō, āwō āyookwook kuchō. 8 Paani kāchō :inyeentee kung'uutinii piich chēpō ng'wēny kilē māting'ēy man :akwaaneek nkōō wōloo pkootitooy akipō ng'ōōki, kir nyēpō man nkōō wōloo rwoochiintooy :Iriin ng'wēny. 9 /Kung'uutinii kilē ng'ōōki nēē meeranan :piich.

2 Tiimōti 2:10 Ārānēy akiring' kir aka tōkōl akipō piich choo kiikulēwēn :Iriin, sikusāru akwaaneek :Yēēsu Kiriistō akunyōōru sopoon nyēpō kwōng'uut nyēpō ākōy.

Rooma 15:20,21 Nkōō pāyiisyeenyuun, ku kyaatyam aneen ā-āmchi lōkōōy choo kāroomēēn piich choo kiitoomō kuteer akipō Kiriistō āmu kiimoomāraa awaanta kō nyoo kiikuisin :chiitō aka. 21 Ku karkeey nyoonēē nkōō paani mwoorēy :siruut kilē, "Tēērēy :choo kitoomō /kēēmwoochi aku sōwu :choo kiitoomō /kuteera iitiikwaak."

Pāyiisyōōnik 2:36,37 Kitas taay :Pēētērō kimwa kilē, "Kaykay kusōwu piich chēpō Israayeel tōkōl kilē Yēēsu nyēēnyi nyi kyaakarkaat :akwaan nkōō kimurtooyoon nyi kii-ir :Iriin kilēku Kiptaayaan akilēku Meesaaya." 37 Paani kateer :piich ng'aleechoochēē kiimwoorēy :Pēētērō, kuuring' mukuliiriikwaak, akung'woonchi. Kimwoochi :pichoochēē Pēētērō ākōō kāāyooytooyiik chuuchō walak kilē, "Choo kituupchō, ara ki-ir nee?"

Epuraan 4:2 Kiikeeteer lōkōōy choo kāroomēēn kilēē wōloo kiiteerta :pichoochēē. Aku maatoorēt :lōkōōyichoochēē pichoochēē āmu maaran ng'alēechoochēē kiitēērēy.

Cheeremiya 24:7 - Mataayo 22:37 Kuwālchi :Yēēsu kilē, "Icham Iriin Kiptaayaantēēng'uung' nkōō moong'uung' tōkōl, sāpoontāng'uung' tōkōl, ākōō kaapkootuutēkuuk tōkōl.

Pāyiisyōōnik 16:14 Nkōō chēēpyōōsōōchoochēē, ku kiimii :cheepyoosee aka nyoo /kiikukuurēē Liitya nyoo kiichōōnēē Tyaatiira. Kyooltooy :cheepyoosoonoonēē sirooy choo pirirēēn choo kwoolēē rōōpiyō chaa chaang'. Kiikoonyitēy :cheepyoosoonoonēē Iriin. Kutoorēt :Iriin cheepyoosoonoonēē kuuran kiyoo kiimwoorēy :Paawulō.

Mataayo 13:14-16 Kulēku nyuun man :ng'aleechu kiimwoorēy :ōōrkooyoon Isaaya kilē, 'Ātēērtooy, āmoosōwuuy ākoomārārtooy, āmoonyitēy. 15 Āmu kiiyoomō pichu :mētēwēy, akumiinyiisyō :iitiin akukāriisyō :koonyiikwaak, ntā kāmālēē nyoonēē, tākāmārātēērēē :koonyiikwaak, akuteerteeree :iitiikwaak, akuyootiisyō :mētēwēyiikwaak akuwāliisyō kupka wōli āmii asoop akwaaneek.' 16 Aku akwaan

pēeruurootēēn āmu mārārtooy :koonyiikwook akutēērtooy :iitiikwook.

Isaaya 6:9,10 - Pāyiisyōōnik 28:27 Āmu kii-ururiituuy pichu :mētēwēy, akiikukāriisyō :iitiikwaak, akukōryō :koonyiikwaak. Ntā kēēmuukēē kuumararta :koonyiikwaak, akuyootisyō :iitiikwaak, akusōwu nkōō mētēwēyiikwaak, tākiikuwāliisyō akichaman āsoop :aneen akwaaneek.' "

Maarkō 4:11,12 Kuwālchi :Yēesu kilē, "/Kiikēēchāmwook āsōwu kiyoo ung'aat akipō :Pāyunātoo Iriin. Ku piich walak, kutēērēē ng'al tōkōl kārkeēyin. 12 Kulēē paani kiikisir nkōō :kiitapuu oōrkooyoontoo Iriin kilē, 'Mārārēy :akwaaneek, amēēnyitēy. Kuteer, amāsōwu. Āmu nēē ro akusōwu, kuwāliisyō /akēēnyōōchi kaat.' "

Chowaana 12:39,40 Kiimaaran :pichoochēē Yēesu kilēē paani kiimwooru :Iriin kupunuunō Isaaya kilē, 40 "Kyaa-ir :aneen ku kōryo :koonyiikwaak akaa-ir kuyoomō :mētēwēyiikwaak. Tāmāmārārteera koonyiikwaak, ntā kisōwu nkōō mētēwēyiikwaak, simāwāliisyō kupka wōli āmii soosoop akwaaneek."

Rooma 11:7,8 Maanyōōru nyuun :piich chēpō Israayeel kir nyoo kiiwāsēy. Choo kiinyōōru man ku choo kiilēwēnootēēn, ku chuuchō walak /kee-ir kukāriisyō mētēwēy 8 kilēē paani mwoorēy :siruut kilē: "Ki-ir :Iriin kuyoomō :mētēwēy. Ting'ēy koonyin amēērōōstēērēē, ting'ēy iitin amātēērēy ng'al ākōy paannyēēnyi."

2 Teesaloonika 2:10,11 Pāyiisyēērēē ng'ālyoon aka tōkōl nyēpō ng'uurnan kuumēlmēēlēy piich choo pētii kupētsōt. Pētsōt :pichoochēē, āmu kiitay :akwaaneek kucham ng'ālyoontoo man /sikēēsāru. 11 Kunyuun, irēy :Iriin akwaaneek kuuran ng'uurnan,

Mataayo 13:18-23 "Ateertee nyuun ākooyāpchi iit kiyoo ng'uutuuy :kārkeēyin nyēpō pāliintēē ākōō nyung'wēēk. 19 Chiich aka tōkōl nyoo tēērēy lōkōōy chēpō Pāyuunātoo Iriin amāsōwu kilē mwoorēy nee :lōkōōyichoochēē, ku karkeey ākōō aree oor nyoo kāchinchi kāsur. Tēērēy :chiichoonēē ng'al aku nēē chō :Syeetaani kusara kiyoo kateer. 20 Paree yoo mii :korin, ku karkeey ākōō chiich nyoo tēērēy ng'ālyoon, akutaak kilē weel nkōō pāypooyō, 21 aku māmāmēy nyuun :chiichoonēē ng'ālyoontoononēē kukaraam, amātāsēy taay kuurānēy nyoo lōōw. Ku nēē chō :nyaril /akēēwus akipō kaaraneenyiin, kuuchuchuuka kilē weel. 22 Paree yoo mii :katōōy ku karkeey nkōō inyeentee nyoo tēērēy ng'ālyoon, wōloo nyuun kutoowu kuupkaat tukun chēpō ng'wēny akicham mōkōrnoonti. Kiichēy :tukuuchoochēē ng'ālyoontēē kuti mayi lokor. 23 Nyung'wēēk choo kāroomēēn ku karkeey ākōō chiich nyoo tēērēy ng'ālyoon akuukiilchi keey. Nāmēy aka par chaa chaang', kunam aka chēpō kwēēn, kunam aka choo ng'ērin."

2 Kōōriintō 3:15,16 Mpō nkōō paannyēēnyi, /kēēmiitō /kēēsōōmānēy siruut chēpō Muusa, ku tākukārootēēn koonyiipō piich. 16 Ku, nēē tēpō :chiich ākōy kuwal kāāpkootuutēchiich akicham Kiptaayaan, /kēēsualtooy kiyoonēē kiikar koonyiichiich.

Oseeya 11:3-7 - Mataayo 11:28-30 Apkoonchoon akwaan tōkōl :choo kyoochoosyō ākālāpēy tukun choo nyikiisēēn, soomuung'wook. 29 Akasana lōkōleenyuun akaaneeteenaan keey, āmu aneen tala ākoo-āpēy keey ng'wēny. Ātālāyituu nyuun kilēē aneen. Nēē a-ir kilēē nyoonēē, ānyōōru āmuung'. 30 Āmu toorētiin :lōkōlēēnyuun, amanyikiis."

Pāyiisyōōnik 26:18 iweeyaak mētēwēyiikwaak akiikany kupkaana wōloo mii :tuurin

akupka :lēpooyin, akupkaana wōloo pāytooy :Syeetaani kupka wōloo mii :Iriin. Si nēē tiirēēnoon keey, /kēēnyōōchi kaat ng'ōōkiikwaak akunyōōru kumāng'iisyō ākōō piich walak choo /kiikēēlēwēn.' "

- 2 Tiimōti 2:24-26 Machamaat nkōō kipāyityoon nyoo irēy pāyiisyoo Kiptaayaan ku-ir riiri. Makaat kutalayiit nkōō wōloo mii :chiich aka tōkōl, kuuneet nyaa karaam akimurtooy ng'al chaa chaang'. 25 Ku nēē mii :piich choo kwiintoochini inyeentee, ku maraat ku-isu pichoochēē muutyō akuting'ēē moo kilē muukēy :Iriin ku-ir akwaaneek kuwāliisyō tākusōwu man. 26 Kuumuukēy nyuun :akwaaneek kusōwu man sikuchirila ng'ērēpoo Syeetaani nyoo kiikunam siku-ir kiyoo mārēy :inyeentee.
- Ng'oong'uut 3:17-19 Āmwoorēēkwaan kilē, āmōkōrō. Ākooting'ēy kir aka tōkōl nyoo āmārēy amoomii :kir nyoo mooting'ēy. Aku, moorōōtēēkwaan kilē ānyārilsōōt, akyoolēku piich choo /kuriirēē, ākōō mēēy, ākookōryootēēn akaapka kimutultiin. 18 Āmwoorwook nyuun kilē a-aleenaan kōōliti nyoo /kiikiitiliilēē ma, toolēkuu mōkōrō. A-aleenaan sirōōy choo reelacheen taalaaka āmoomutuultō ālēku sōōr. A-aleenaan saakit taa-iilee koonyikwook taamarartee. 19 Āpkoong'ēy ākoochuulēy piich choo āchāmēy. Achikana nyuun ākoowāliisyō.
- 2 Kōōriintō 7:10 Muukēy nyuun kupāyisyēērō :Iriin ng'woonin kuwal chiich, /ākēēsāruunō chiichoonēē ng'ōōki. Karaam :ng'woonin nyoo lēē nyoonēē. Aku ng'woonin nyoo mākōōnuuy walat ku-āpuuy meerat.
- 2 Kōōriintō 4:4 Kiiku-ir :Syeetaani nyoo pāyuuy ng'wēnyuuni kukōryō :pichoochēē toomō kuuran ng'ālyoontoo Iriin simeero lēpooyin nyēpō lōkōōyichoochēē kāroomēēn choo ng'uutuuy tōrōōrin nyēpō Kiriistō. Inyeentee nyoonēē ng'uutunēē keey :Iriin. 1 Pāytooyiik 18:37 - Iriin turn heart back to Iriin.
- Luuka 8:11-15 Akanya ārārwook kiyi mwoorēy :kārēēyini. Kāsuryoontēē ku ng'ālyoontoo Iriin. 12 Karkeey :piich walak nkōō aree oor nyoo kāchinchi :kōsur. Tēērēy ng'ālyoontēē, aku chōōnēy :Syeetaani akusaree ng'ālyoontoononēē simeeran /ākēēsāru. 13 Ku paree yoo mii :korin ku karkeey nkōō piich choo tēērēy ng'ālyoon akutaak nkōō pāypooyō, akumānāmēy nyuun :pichoochēē ng'ālyoontoononēē kukaraam amātāsēy taay kuurānēy nyoo lōōw. Nēē nyōōru :ng'al choo kōrōōmēēn, kuuchuchuukiisyō. 14 Paree yoo mii :katōōy ku karkeey nkōō akwaaneek choo tēērēy ng'ālyoon, aku nēē mii kutāsēy taay, kuupkaat tukun chēpō ng'wēny, mōkōrnoonti ākōō lala nyēpō ng'wēny. Kiichēy :tukuuchoochēē tōkōl pichoochēē kimakiilyō. 15 Ku nyung'wēēk choo kāroomēēn ku akwaaneek choo nēē teer ng'ālyoon kunāmēy nkōō moo nyoo rēēl, akumurta ākōy kunam par."
- Pāyiisyōōnik 15:11 Acha, mālēē nyoonēē! /Kiikusārēēch nkōō chamataa :Kiptaayaan Yēēsu, aku lēē nyoonēē mpō akwaaneek."
- Rooma 8:12/13 Kunyuun oo, tuupchēēnichuuch, mii :ng'ālyoon nyoo mārēy kee-ira akuutoorētēēch :Toomirmiir nyoo Tiliil. Makaat kēēmētēē tukun chaa raacheen choo kiicham kēē-irēy. Chiich nyoo tuupēy ātēpuutēchoochēē pō taay, kumēērēy. Ku choo tuupēy Toomirmiir nyoo Tiliil ku sāpsōōt.